

նողոք: Քամին պողպատէ աղոաներ ունի. ձիւնը իջնում է խայթող մարակները ձեռքին: Նաւը պառկել էր կատաղի այս մրրիկների մէջ սառած դիակի նման. գիշերները գայլերը եւ բորենիները գայիս պատում էին նրա շուրջը եւ՝ խարուած՝ քերում էին նրա սառնիքներով ծածկուած երկաթէ կողքերը, արիւնում իրենց թաթերը, յետ քաշում եւ ոռնում: Երբեք, աշխարհի ոչ մի նաւ այդպիսի արկածի չէր հանդիպել:

— Հայաստանը անողոք երկիր է:

— Գիւրին չի ենթարկուում նորածեւութիւններին: Օտարի հետ հիւրընկալ չէ: Նա ունի իր ներքին, անփոփոխելի օրէնքները, որոնց դէմ թոյլ չի տալիս, որ մեղանչեն: Պատժում է անողոք կերպով, քարէ իր մատների տակ ամէն ինչ ճգում է, ոչնչացնում եւ քամիներին յանձնում:

— Հին երկիր է:

— Հին երկիր է, որին հասկանում են գիւղացիները եւ մանաւանդ հովիւները:

— Եւ այդպէս, ձիւնի եւ անձրեւի տակ ծեծուած, խեղճ նաւը պառկեց ամայի այս վայրերում վեց ամիս:

— Վեց ամիս:

— Այո՛: Այդպէս, քիթը ժայռին տուած, ետեւի պտուտակը քամիների դէմ, փորը ներս ընկած, դժբախտ այդ մեքենան մարտիրոսացաւ, սանջուեց, շարժարուեց գաղտնի իր վարդապետութեան առաքելական ճանապարհի վրայ: Երբեմն նաւապետը գալիս էր, խրուում էր՝ մինչ ծունկերը ձիւնի մէջ, շօշափում էր սառած դիակը, մտածում էր, չափում էր եւ գլուխը վար գցած հեռանում էր: Գարնան առաջի անձրեւներին, ձիւնը սկսեց հալուել եւ նաւը, որ ժամանակին ճերմակ էր, տեղ տեղ դեղնած, տեղ տեղ ժանգոտած, արեւի առաջի ճառագայթների տակ կարծես հոգի առաւ: Բոյնից վար ընկած, անփետուր, հսկայ մի ճնճղուկի էր նմանում: Ծիծաղելի եւ տխուր տեսք ունէր: Միամիտ եւ անպաշտպան: Ծըխներույդի շուրջը ծիծեռնակներ էին պտուում: Մէկը սկսել էր բոյն շինել: Վարի կամրջակի տակ, չգիտես որտեղից եկած մի կատու, ղետեղել էր իր նորածին փոքրիկները: Անցնող կովերը սիրում էին կանգ առնել նաւի մօտ եւ գլուխները քսել երկաթներին: Միակ կենդա-

նիները, որ նրան չէին սիրում, հովիւների բարկացոտ շուններն էին. հեռուում կանգնում էին եւ սկսում հաջել:

Սեւցած, մաշուած այդ բեկորը, միջավայրին պատշաճելով, կարծես սկսել էր նոր մի կեանք: Ամայի լեռների մօտ, լուսկեաց եւ կիսաքանդ ճանապարհի ծայրին պառկած, նա եկել էր վկայելու փոթորիկների յիշատակը, լեռների ետեւ տեղի ունեցող բարդ լինելիութիւնը: Պարասը պատճառ էր, որ աստուածները ստեղծագործեն: Կամրջի վրայ խոտը սկսել էր բուսնել, ծիւնելույդի տակ մամուռը թագնուած սերմեր էր ծածկել, եւ երկաթէ պատերի շուրջը արեւը հողի հետ խառնուած նոր բուսականութեան հետ սկսել էր բարախել, երբ յանկարծ, նաւապետը՝ աւելի քան երբեք յամառ՝ եկաւ մէ խումբ մարդկանց հետ եւ սկսաւ փորել: Ու նորից սասնեղու գոյգե եղներ, ճոռան անիւներ, հառայ հուրայ...

Նաւը վեր հանեցին եւ տարին: Ծիծեռնակները որոշ ժամանակ ետեւից եկան, բայց վերջ ի վերջոյ, յուսահատուած վերադարձան: Կատուն իր ճագերի հետ պատասպարուեց մի ժայռի տակ. միայն շունները շարունակեցին բարկացած հաջել՝ մինչեւ որ նաւը տեղ հասաւ:

— Ուրեմն տե՞ղ հասաւ:

— Հասա՛ւ, ամիսներ յետոյ:

— «Լուկաշին» նաւն է, որ մեզ պիտի տանի Նոր-Բայաղէս:

— Իսկ նաւապետը:

— Նաւապետն էլ այնտեղ է: Այլեւս հերոսացած՝ նա Սեւանայ լճի տէր ու տիրականն է, ադմիրալը, ծովային սպեցը: Իրականի մէջ խելքը գլխին մարդ է, շատ գործնական, հաշիւը իմացող: Աչնան մօտակայ գիւղերից կարագ է առնում եւ քաղաքում ծախում: Իր ծրագրիները ամբողջովին տնտեսական են, դրական, օգտակար:

— Երկու նաւերի այդ պատմութիւնը՝ Հայաստանի երկու հանրապետութիւնների պատմութիւնն է:

— Իսկապէս...

— Բեսարաբիայից եկած դալկահար, լըուսկեաց երիտասարդ այն սպան, մինակ, պատրուած իր կօշիկներով, լճի ափին շինում է